

SCRIPT OF EVENING GOJRI NEWS BULLETIN 24SEP 2026

1700HRS

اوننگ گوجری نیوز بولیٹن 24 ستمبر 2026

یوہ آکاشوانی جموں بے محمد اشفاق تے نصرت تیں خبر سُنو۔

HEADLINES

- ۱۔ جموں کشمیر حکومت نے اے اے وائی خانداناں واسطے 6 مفت گیس سلینڈر دین غی منظوری دے دتی ہے جد کہ بی جے پی غو کہنو ہے جے سرکار نے 12 گیس سلینڈر دین گو وعدو کیو تھو۔
- ۲۔ جموں کشمیر غی قانون ساز اسمبلی نے 2019 توں پہلا پرتھی ہوا اساتزہ نانہ ٹیٹ توں بری کرن بارے قرار دار نانہ منظوری دے دتی ہے۔
- ۳۔ وزیر اعلیٰ عمر عبداللہ نے گریٹر نویڈا مانہ ہوا بس حادثہ اندر قیمتی جانان گا نقصان ور دکھ غو اظہار کیو ہے۔
- ۴۔ حکومت نے دسیو جے جموں کشمیر مانہ قریب 12 لکھ 89 ہزار کسان فصل بیمہ سکیم گا احاطہ مانہ شامل ہیں۔
- ۵۔ حکومت غی اطلاعات غے مطابق، جموں کشمیر اندر قریب 5 لکھ 73 ہزار، ایس ٹی دو غا سرٹیفکیٹ جاری کردتا گیا ہیں۔

FREE GAS CYLINDERS

وزیر خوراک ، شہری رسد تے امور صارفین ستیش شرما نے اج قانون ساز اسمبلی نانہ دسیو کہ حکومت نے انتودیا ان یوجنا غے تحت آن آلا خانداناں واسطے 6 مفت گیس سلینڈر دین غی منظوری دے دتی ہے۔ انہاں نے کہیو کہ 6 مفت گیس سلینڈر دین غی سکیم نانہ متعلقہ حکام تیں منظوری مل گئی ہے۔ اس بارے مزید تفصیلات جلد دسی جیں غی۔ اس اعلان تیں بعد حکمران جماعت غا ارکان نے میزاں نانہ تھپ تھپا غے خوشی گو اظہار کیو، جد کہ حزب اختلاف بی جے پی گا ارکان نے حکومت غے خلاف نعرا لایا۔ بی جے پی ارکان نے حکومت ور 12 گیس سلینڈر دین گو وعدو پورا نہ کرن غو الزام لایو ، جس غی وجہ تیں اسمبلی مانہ شور شرابو ہوو۔

TET RESOLUTION

جموں کشمیر غی قانون ساز اسمبلی نے اج اساتزہ نانہ ٹیٹ توں بری کرن بارے قرار دار نانہ منظوری دے دتی ہے یاہ قرار دار وزیر تعلیم سکینہ اتو نے پیش کی جس مانہ 31 اکتوبر 2019 توں پہلاں پرتھی ہوا اساتزہ نانہ ٹیٹ توں چھوٹ دین بارے سوال کیو گیو۔ بعد مانہ دو تہاڑاں غی بحث غے بعد قرار دار صوتی ووٹ سنگ منظور کی گئی۔ قرار دار مانہ مرکزی حکومت توں اساتزہ بارے قومی کونسل غے ذریعے ٹیٹ توں چھٹکارا بارے اہم منظوری جاری کرن غو مطالبو کیو گیو۔

CM NOIDA BUS ACCIDENT

وزیر اعلیٰ عمر عبداللہ نے گریٹر نائڈا گا الماک بس حادثہ مانہہ قیمتی جانناں گا نقصان ور گہرا دکھ گو اظہار کیو ہے۔ انہاں نے جاں بحق ہوا افراد گا لواحقین سنگ تعزیت تے زخماں غی جلد صحت یابی واسطے دعا کی ہے یاد رہ جے یوہ حادثو گریٹر نوائیدا مانہہ اُس وقت پیش آیو جد دہلی توں بہار جا رئی ایک بس اگ غی لپیٹ مانہہ آگئی ، جس مانہہ 9 افراد غی موت واقع ہوئی تے کنیں دوجہ زخمی ہوا ہیں۔

JITENDRA KALADI

مرکزی وزیر ڈاکٹر جتندر سنگھ نے دسیو جے ادھمپور غی جی آئی ٹیگڈ کلاڑی پنیر نے مقامی تے عالمی بازاراں مانہہ اہم مقام حاصل کیو ہے۔ رام نگر تے ادھمپور غی اصل کلاڑی نانہہ خصوصی ڈوگرہ پکوان گا طور ور پیش کیو جے۔ اس ضمن مانہہ سائنسی تحقیق تے کرناٹکہ غی سی ایف ٹی آر آئی غا بابمی تال میل سنگ اس گا فرج مانہہ محفوظ رکھن دورانہہ نانہہ 4 ہفتہ توڑی بدھا دتو ہے اس بارے مزید جانکاری دیتا واں جناب سنگھ نے اس طرح کہیو۔

SAMBA RAINFALL

ضلع سامبہ مانہہ اج سویرے اچانک بارش تے تیز ہواواں سنگ موسم مانہہ نمایاں تبدیلی آئی ہے۔ اس دوران تیز ہواواں تے چکھڑ پاندا سنگ دھان غی فصلان نانہہ خاصو نقصان پُجیو ہے تے رام گڑھ ، نند پور ، راجپور، تے نال آلا علاقان مانہہ تیار شدہ دھان غی فصل زمین ور تہ غے تباہ ہوئی ہیں۔ اس ضمن مانہہ کساناں نانہہ خدشو ہے جے مزید بارشاں تے چکھڑ پھانڈا سنگ فصلان نانہہ ہور نقصان پُج سکے۔ مزید معلومات دیتا واں مہارا ضلع نامہ نگار نے اس طرح کہیو۔

JK PMFBY

حکومت غی اطلاعات غے مطابق پردھان منتری فصل بیمہ یوجنا تے موسمیاتی بُنیاد ور فصل بیمہ سکیم جموں کشمیر گا کُل 20 ضلعان مانہہ نافز کی جارئی ہے اس غے تحت قریب 12 لکھ 89 ہزار کساناں نانہہ بیمہ تحفظ فراہم کیو گئیو ہے تے نال ہی کساناں نانہہ فصلان گا نقصان ور ہُن توڑی 2 سو 21 کروڑ 71 لکھ روپیا بطور معاوضہ اس سکیم غے تحت دتا جا چکا ہیں واضع رہ جے جموں کشمیر مانہہ اس سکیم غے تحت 13 لکھ 9 سو 85 کسان خاندان مقرر اصولاں غے مطابق فائدو حاصل کرن گا اہل ہیں۔

ST-II CERTIFICATES

حکومت نے اج قانون ساز اسمبلی نانہہ دسیو کہ جموں کشمیر مانہہ پہاڑی برادری تیں تعلق رکھن آلا اہل افراد نانہہ ہُن توڑی 5 لکھ 73 ہزار تیں متہ ایس ٹی دو غا سرٹیفکیٹ، جاری کیا جا چکا ہیں۔ آکاشوانی جموں گا نامہ نگار غے مطابق، اسمبلی مانہہ پیش کیا گیا اعدادو شمار غے مطابق، جموں کشمیر غا تمام 20 ضلاع مانہہ مجموعی طور ور 5 لکھ 73 ہزار 6 سو 67 ایس ٹی دو سرٹیفکیٹ جاری کیا گیا ہیں۔ محکمہ مال غا وزیر نے دسیو کہ جموں کشمیر غا اہل افراد نانہہ ایس ٹی دو

سرٹیفکیٹ جاری کیا جاچکا ہیں۔ اعداد و شمار غے مطابق جموں صوبہ مانہ 5 لکھ 4 ہزار 7 سرٹیفکیٹ جاری کیا گیا ہیں جد کہ کشمیر صوبہ مانہ 69 ہزار 6 سو 60 سرٹیفکیٹ جاری کیا گیا ہیں۔

CAR POLICY

وزیر ٹرانسپورٹ ستیش شرما نے اج جموں کشمیر قانون ساز اسمبلی مانہ دسیو کہ نظر ثانی شدہ کار پالیسی ، اس وقت حکومت غے زیر غور ہے۔ انہاں نے دسیو کہ اس پالیسی مانہ ایک افسر ایک گاڈی گا اصول متعارف کران غی تجویز ہے۔ وزیر نے یوہ جواب م رنبیر سنگھ پٹھانیا غی جانب تیں پوچھیا گیا سوال غا جواب مانہ دتو۔ انہاں نے کہیو کہ مجوزہ پالیسی مانہ ضرورت غے مطابق ، گجھ خاص معاملات مانہ چھوٹ وی دتی جاسکے۔ یہ اجازت سکیورٹی غی ضرورت، فیلڈ ڈیوٹی، اضافی ذمہ داری ، ہنگامی حالات تے بکھ بکھ محکماں یا اداراں ، غی ضروریات مانہ مدد نظر رکھتا وا دتی جاسکے۔ انہاں نے کہیو کہ نظر ثانی شدہ کار پالیسی مانہ حکومت غی منظوری ملن تیں بعد اس مانہ نافذ کیو جے غو۔ انہاں نے مزید اس طرح کہیو۔۔۔۔۔

STARTUP IDEA

جموں کشمیر کاروباری ترقی ادارہ نے اج شری کرشن چندر گورنمنٹ کالج پونچھ مانہ اسٹارٹ اپ آئیڈیا چیلنج 2 عشاریہ صفر گو انعقاد کیو۔ اس پروگرام گو مقصد نوجوان طلبہ مانہ نوا خیالات تے کاروبار شروع کرن غا جذبہ ناتہ فروغ دینو تھو۔ پروگرام مانہ بکھ بکھ کالجاں تے تعلیمی داراں گا طلبہ نے شرکت کی۔ طلبہ نے اپنا نوا کاروباری خیالات، ماہرین غی ایک کمیٹی گے سامنے پیش کیا، جن غو جائیزو لیو گیو۔ شرکائ نے بکھ بکھ ایسا خیالات پیش کیا جن مانہ تخلیقی صلاحیت ، جدت تے مستقبل مانہ کامیاب کاروبار بنن غی صلاحیت نظر آئی۔ پروگرام غو افتتاح، ایس کے سی ، جی ڈی سی، پونچھ غا پرنسپل ، جسبیر سنگھ نے کیو۔ اس بارے مزید جانکاری دیتا واں ضلع نوڈل افسر، جے کے ای ڈی آئی آمیر شفیق نے اس طرح کہیو۔۔۔۔۔

NSS DAY POONCH

قومی خدمت سکیم این ایس ایس 56 ویں سالگرہ غا سلسلہ مانہ گورنمنٹ ہائیز ہائی سکینڈری سکول پونچھ غا این ایس ایس یونٹ تے رضاکاراں نے ایک پروگرام منعقد کیو۔ اس پروگرام غو موضوع ، ناٹ می بٹ یو یعنی او ، نی بلکہ تم ، تھو۔ پروگرام مانہ این ایس ایس گا رضاکاراں ، طلبہ ، تدریسی عملہ تے دیگر مقررین نے شرکت کی۔ مقررین نے طلبہ مانہ سماجی خدمات ، سماجی ذمہ داری تے رضاکارانہ خدمت گا جذبہ ناتہ فروغ دین مانہ این ایس ایس غا کردار تے اہمیت ور روشنی کہلی۔ اس موقع ور بکھ بکھ مقررین نے این ایس ایس گا مقاصد تے کامیابیاں گا بارا مانہ دسیو۔ اس سلسلہ مانہ مزید جانکاری دیتا واں سکول غا پرنسپل انور خان نے اس طرح کہیو۔۔۔۔۔
